

26





太平三書卷之十

濟南張萬選舉之甫編輯

風雅一集

青山記

郭祥正

當塗有山曰青山又曰謝公山齊謝玄暉守宣城時  
建別宅於此山而每往遊焉廢地遺址隱隱尚存左  
丹湖右長江穹窿盤礴延數十里爲當塗諸山之表  
山之東南修松夾徑而上幾二百丈依岸立屋曰巢



雲亭亭之陰甃甃爲磴道又十餘丈三門翼然臨于  
亭上曰白雲之院院之中亭有石窟淳泉深三十尺  
色若粉乳而味甘益茶歲或大旱不竭因窟壘石爲  
方池跨池爲飛橋以登於殿殿之北爲堂環以廊廡  
東爲齋羞之厨西爲待賓之所堂之北爲檻面圃植  
金沙茶蘼延蔓而爲洞佳花美竹交幹而成林當濤  
明花敷之時遊人無日不來雖太守亦有時而至也  
由巢雲而望則春空晴明千里一碧良田沃壤高下  
而相連長溪深溝回旋而交映行人往來飛鳥出沒  
蓋不可以目力窮也而或雲煙晦冥雷雨震作窓戶  
之下咫尺莫辨居僧恬然見以爲常則院據山之高  
處槩可知矣始謂之南峰院載於圖經而無碑志可  
以考其建置之迹嘉祐中改賜今額我先君金紫當  
祥符間爲進士結友習課於南峰者久之吾母同安  
郡太夫人張氏又家于此山之下予晚仕于朝或進  
或退數過是院登高遠望而思吾先君之遺風思無



可得者欵椽敗瓦不蔽風雨未嘗不感慨太息而去  
至熙寧中有僧希仁始來住持未果興構遽卒弟子  
懷式者繼之式有才略不求於人而求於已一金而  
積積至數千萬緡歷二十餘年而所謂殿堂廊廡三  
門池亭之屋一切新之又召良匠塑佛菩薩侍衛凡  
九軀金碧煥耀冠纓飛動爲一山之鎮焉嗚呼盛哉  
蓋院之廢興繫乎主者之才否抑亦有其時耶宋受  
天子神聖繼位皆以仁治天下好生而惡殺戢兵而  
惠民是以時和歲豐民阜於財而浮屠氏求取於民  
者無厭然民亦喜爲之施也於是列剎相望爭以侈  
大爲勝事式師則不然因山而爲屋因泉而爲池壯  
而不僭朴而不陋聚景物之佳趣資衣冠之盛遊其  
興作之費一出于已而不求于人也得不謂之才乎  
浮屠氏聞式師之風者亦可以懷愧矣予故爲之叙  
其事刻于碑使後之人有以考焉

懷青山草堂

前人



三峰連延一峰尊龍山白紵如兒孫重岡復嶺控官  
道北望金陵真國門淙流奔激灑河漢兩溪直接丹  
湖源松荒檜老古佛剝雞鳴春曉桃花村石崩廢井  
謝公宅龜仆斷碣長庚墳斯人白骨已化土英氣往  
往成烟雲我昔棄官結茅宇九品青衫安足數竹筒  
盛酒騎白牛醉眼瞻天與天語寧知一旦隨辟書十  
年又向塵途趨只今兩鬢滿霜雪功業不成思舊廬  
山花解忘憂山鳥鳴提壺四隣未必便棄我三徑荒  
草還堪鋤烏泥田肥種秫稻紫萸味美饒嘉魚盈缸  
釀酒邀客飲林下散髮時時梳誰人繫爾不歸去自  
問此心無乃愚

采石渡

前人

采石渡頭風浪惡九道驚湍注山脚金牛出沒人莫  
知翠壁巒岒嶮如削上有藤蘿羃霧張羽蓋下有洞  
窟崩澌震天樂水神開府定歲年犀燭朱衣馬爭躍  
我來攬古憑陽春高吟未遇謝將軍騎鯨捉月去不



返空餘綠草翰林墳風期亢爽非今古冥冥神交兩  
相許倒提金斗傾濁醪滴瀝招魂寂無語斜陽啣山  
暝潮退兩兩漁舟迷向背便欲因之垂釣竿六鼇一  
擲天門外

望夫山

前人

帆去帆來人不識歲歲年年望無極夕陽欲盡洲渚  
昏猶見天門一雙碧

暮秋登黃山

前人

秋風已瀟灑臨高念歲窮陣收羣雁沒峰斷片雲空  
月色山川內笛聲關塞中西人未柔服長策在諸公

廣福禪寺

前人

寺與人寰隔西軒更遠瞻雲烟分卷箔星斗半垂簷  
山對眉雙碧江空鏡一奩旅魂招不盡愁向酒中添

玩鞭亭

前人

平湖春靜水陰天基壓危城駕廣椽駿馬豈能追晚  
日將軍莫悔玩遺鞭高才共賦新亭句逸翰重將舊



曲鑄千古英雄只如此黃花修竹付幽禪

化城寺清風亭

前人

唐時升老亭剪棘今重開南瞻峨眉關北峙凌歊臺  
新公將家子爲僧亦多才譬彼獨鶴唳安用羣雞猜  
或彈玉軫琴傾耳濯纖埃清風不知處凜冽時時來  
吹雲雲窈窕吹月月徘徊幽人許共賞渴心咀珍梅  
了然得真味塵魂自然摧令侄又豪俊書名駭奔雷  
禪談屢終夕茗酌無餘盃還歌太白篇事往良可哀

古今倘同轍浩氣不寒灰

凌歊臺

前人

宋武登臨避暑敲當年歌吹逼雲霄天涵暗色收平  
遠潮逆江聲送寂寥人跡有誰能暫息客魂無着易  
爲消只今莫問興亾事且撥香醅醉一瓢

隱靜普惠寺

前人

碧霄峰下車輪停道師未返誰逢迎山雲着地雨正  
急春水滿田人不耕饑虎嘯風大石裂倦鳥喚雛深



澗鳴客心欲去日復止坐飽香飯餘何營

北園載酒和蔡確詩

徐 迪

簷影蔭游魚江聲顛崖竹雲帆天外去龍刹空中矗  
霞明晚渡紅草暖晴沙綠澄波見歸鳥紛靄迷飛鷺  
有時雪浪吹玉馬爭追逐青霄皓月滿琉璃瑩顛目  
謝傳昔出宰天葩動驚俗一讀梁間詩清風感佳木

廣福寺

張 祁

老矣丹心在愁來酒興濃江山造古意雲水淡秋容

落日孤村笛微風遠寺鍾平生善知識却憶妙高峰

乾道修學建閣記

張孝祥

學古也廟于學以祀孔子後世之制也閣于學以藏  
天子之書古今之通義而臣子之恭也當塗於江淮  
爲名郡有學也無誦說之所有廟也無薦享之地有  
天子之書坎而寘之屋壁甲申秋直秘閣王侯相來  
領太守事於是方有水災盡壞隄防民不粒食及冬  
則有邊事當塗兵之衝上下震搖侯下車救災之政



備敵之略皆有次序饑者飽壤者築赤白囊晝夜至  
侯一以靜鎮之明年春和議成改元乾道將釋奠于  
學侯語教授沈瀛曰學如是今吾州內外之事略定  
孰先於此者命其掾蔣暉呂濱中撤而新之先是郡  
將欲樓居材旣具侯命取以爲閣闢其門而重之凡  
學之所宜有無一不備客有過而歎曰賢之不可已  
也如是夫今之當塗昔之當塗也來爲守者孰不知  
學之宜葺而獨忘之者豈真忘之哉力不贍僉始王  
侯之來民以水爲憂已又以兵爲憂王侯易民之憂  
納之安樂之地以其餘力大新茲學役不及民頤指  
而辨賢之不可已也如是夫客又歎曰堯舜禹湯文  
武之天下傳之至今天地之位日月之明江河之流  
萬世無弊者也時治時亂時強時弱豈有他哉人而  
已僉財用之不給兵甲之不強人才之不多寧真不  
可爲邪詩曰無競維人謂予不信請視新學

遊赭山

前人



昨日一尺雪今朝十八晴  
杲日上積雪光若虹氣升  
江平鏡新磨地迥玉琢成  
赭山有令色令我白眼青  
借馬至東家喚客踏層冰  
帽貂挾裘茸石路五里平  
竹樹紛掩冉珠幢間霓旌  
野僧不慣客倉皇門前迎  
屋古少完璧堂空有危燈  
石上跡宛宛山腰塔亭亭  
劫火偶不燒百年費支撐  
我有一尊酒高處得細傾  
諒非無事飲憂國空含情  
長歌渺寥廓歸路已戴星

夢日亭滿江紅

前人

千古淒涼興亡事但悲陳迹  
迷望眼吳波不動楚山  
叢碧巴驥駮駿追風遠  
武昌雲旆連江赤笑老姦遺  
臭到如今空畱壁軍書靜  
烽烟息通輶傳消鋒鏑仰  
太平天子坐收長策蹴踏  
揚州開帝里渡江天馬龍  
爲匹看東南佳氣鬱蔥蔥  
傳千億

江上晚行

方汝疆

疎雲薄日冷吳江江色蘆花共渺茫  
四五點山煙靄淡兩三枝槩水雲長  
遊魚避網驚微浪幽鷺窺汀下



夕陽興罷歸來更回首滿身明月踏溪霜

石城山

李習

翠微山影暮遙遙林木已經霜露凋空見義兵匡晉  
室只餘禪寺說梁朝冷烟戍卒炊紅腐暖日遊人擁  
翠翹惟有馮夷千載恨夜深和月響江湖

大成殿賦

陶安

遭文明之盛世兮流聲教以彌幅員闢虎闈於璧水  
兮示彝倫之所先校庠布乎郡邑兮咸在廟而清蠲

巍乎大成之禮殿兮嚴報本於文宣承皇后之嘉惠  
兮詔徽稱以致崇撫鄒魯之微言兮盡盛德之形容  
總條貫於金玉兮翕衆音之始終是曰大成兮視夷  
惠焉能同著嘉名而有自兮伴制作乎王宮大江之  
南曰姑孰兮面蒼翠之三峰溪流縹乎城邑兮藹洙  
泗之遺風湛清波之半壁兮循橋門而泃泃蔚喬蔭  
於文檜兮發秀色於蒼芹歲冉冉其屢更兮棟將撓  
而榱桷蠹澹煙蕪於黃昏兮恐佳期之不吾遇苟作



興之有侯兮亦何恨乎遲暮思美人而忽見兮羌避  
迨於南上駕五馬之翩翩兮載雲旌而容與指泮水  
以弭節兮嘗將覲夫靈宇東階兮肅升酌芳馨兮薦  
誠華辰塵兮袞龍騎中庭婁兮綠草生澹觀者兮忘  
情獨侯心兮靡寧謂天地之廓大兮惟聖道其服參  
帝乘龍以撫運兮儒化罔聞於朔南空崇構以宅尊  
兮夫豈卑圖之所堪歲月逝而益圯兮將承宣之我  
慚萃縉紳以詢兮恢新制而經營協靈辰以遷主兮

命梓人使效能擢良材於鄧林兮輦巨石於巖扃百  
工繽紛以雲集兮隱斤斧之轟轟寮屬協心以贊承  
兮曾不日而告成隆殿岬其山起兮象紫微之法宮  
旅楹植立而絢丹兮飛梁駕乎長虹朱甍采桷翼其  
如翬兮仰之高而彌崇信乎不可階而升兮夫何岌  
業而從龍椽木蘭而楸辛夷兮煥玉題與金鋪鏤蒼  
珉以爲礎兮削文杏以爲樞敞寬平於赤墀兮納光  
景於綺疏碧參差其萬瓦兮躍龍鱗於天衢其勢出



類而拔萃兮蓋將與造物而爲徒溘埃風兮排雲類  
特立兮無羣干元氣兮網緼類太和兮萃於一身赫  
奕兮輝煌猶髣髴兮文章倏雲譎而波詭兮象神化  
之無方其陰陽之闔闢兮與日月其齊光晨燎設兮  
獻穀醑安神居兮啓瑤戶皇剡剡兮揚靈率雲霓兮  
來御肅上公兮列侑被赤紱兮自天而下心悒鬱而  
未舒兮睠焉不能舍也位門廡以協制兮建推宏之  
廈也圭冕秩於東西兮挹道德之遺芳五綵彰施於

五色兮粲繡繪於衣裳列星布乎朱扉兮爛昭昭其  
未央士之誠敬有所瞻兮儼素王之洋洋重曰春秋  
紛其多故兮傷周綱之久陵嘉尼山之毓靈兮胡唐  
虞之弗興環連轍以振鐸兮慨無人乎我聆跽祥麟  
於魯郊兮淚浪浪其忽零明王不作孰宗予兮歸闡  
教於遺經開世道之隆平兮示人主之儀刑惟熙朝  
之累洽兮躡漢唐而軼三代恢帝德之如天兮鼓皇  
風於無外建人極以爲標準兮孰若夫子事功之尤



大生民以來未有斯盛兮亦何啻乎羣山之宗岱宏  
悉心以興學兮知化原之有在峙壯觀乎江表兮伊  
斯文之有賴事畢兮功深丹堊煥兮鶚林登俎邊兮  
奏八音告日上丁兮神所歆嚴齋宮兮集衿佩播絃  
誦兮游六藝雲飛騰兮雨滂沛漸教澤兮被萬世諱  
曰孔子之道集大成兮新廟奕奕揭鴻名兮厥高造  
天鬱崢嶸兮龍章當陽儼穆清兮邦之具瞻侯所營  
兮億載文運日月其明兮

青山謝玄暉宅

今爲葆和觀

前人

曾是玄暉舊隱居忽看殊境現仙都池漚晝涌泉根  
活巖木秋凋石骨臞栗殼黃腴獮哺子松巢碧冷鶴  
溫雛道人鍊罷芙蓉鼎紫玉簫橫鳳繞梧

李翰林墓

前人

自別金鑿抵夜郎江南有夢到朝堂酒酣采石風生  
袂屋老青山月滿梁龍管鳳笙遺韻律筆蘆笙竹借  
文章雲飛荒野苔碑斷時有詩人酌一觴



遊蛾眉亭記

前人

出大江而山曰采石昔人因其山川雄麗亭絕壁上以盡登覽之美前直東西二梁山夾江對峙修嫵靚好宛宛如蛾眉遂以名亭亦東南之奇觀也歲久弗治棟宇垣墉日就於弊經歷亦速甫君贊理太平郡府暇日臨視歎曰不葺奚稱遂請于太守鳧山賈公慨然發已資倡謀修營應者翕從未幾煥焉華飾翬飛麗空視昔有加夫采石爲地當南北之衝風帆浪楫繽紛朝夕使客之往來賈貨之繁萃又有文儒韻士遨遊題詠觀其波濤澎湃吞乎吳楚烟雲杳靄出沒乎淮甸一視千里洞無所翳雖窮巖剝澗僻在遐隱莫不貢靈輪秀於軒楹之下况前賢於此遊觀俯仰高風雋烈有關世道之興廢炳炳遺迹昭著古今令人興懷而不能已君能留意於此非特盡登覽之美亦不泯前賢之迹也

天門山

前人



石壁脫扃鏞倚空雙觀臺江流關不住闐闐豁然開  
雲表羣仙望舟中獨客回欲揮千丈筆題鳳記曾來  
登高凌歊臺

前人

粉黛香銷輦路荒雨晴菊意媚重陽長江落木秋無  
際短帽西風鬢有霜千嶂馬騰環重鎮萬松龍舞蔭  
禪房英雄多被繁華誤蜀雪湘雲舊恨長

魯港

前人

昔年遊此地市井簇人煙水驛官船鼓花林酒閣絃  
重來盡蘆渚何異變桑田回望礫磯在臨流獨悵然  
荻港

前人

空垣霜蘚濕鷄犬四無聞恠樹作人立斷碑經火焚  
溝魚爭雪水山鳥哢朝昕信步不知處風林樵運斤  
丹陽湖蒹葭雪霽

潘庭堅

蘆葦雪初霽枝頭半未消漁翁叢底出小艇載瓊瑤

赭山塔

黃禮

一帶峰巒壓巨鰲古今傳說赭黃袍四圍空翠連雲



起百尺浮屠拔地高  
兩過澗前流石髓水環巖下長  
谿毛東風不管興  
亾事開遍誰家幾樹桃

雄觀亭

前人

西望奔流滾滾來  
一亭高占鷲峰開  
排空怒捲千堆雪  
逐岸喧逐萬壑雷  
仙子渡江遺珮去  
鮫人入市賣綃回  
漁翁舞罷釣天樂  
月白風清酒一杯

荆山

前人

兩峰相對鬱嵯峨  
下瞰湖光勝槩多  
練帶平鋪橫翠影  
蛾眉淡掃炤蒼波  
雲連石洞蛟龍宅  
雪壓叢林鶴鶴窩  
夜半白虹光彩發  
誰知碧玉在山阿

長河

前人

老蟾飛影下天衢  
冷浸人間玉一壺  
秋靜龍宮開寶鏡  
夜深淵客泣驪珠  
燈明隔岸收罾網  
櫂過中流駕舳艫  
誰識漁郎有深趣  
短篋獨束寄江湖

橫山龍井

楊體仁

松根石欄空剝落  
古甃苔深林影薄  
一泓寒碧湛渟



滌神物何年露頭角黑雲壓山山欲平  
夜半忽與風雷爭明朝山下新雨足  
野老扶犁歌太平

凌歊夕照

李汶

宋武層臺映夕陽千章喬木晚蒼蒼  
鳥聲還似弦歌奏花艷猶疑粉賦光  
雪盡湘潭山隱映江通巴蜀水微茫  
登臨却憶繁華地搔首西風感慨長

采石

李勝原

夜深風靜水無波獨立江頭且浩歌  
買酒放懷人醉後滿船無奈月明何  
袁宏泊渚名猶在溫嶠燃犀恨已多  
明日江頭掛帆去興來重淬劍鋒磨

魯港

前人

一日風帆駕雪濤晚來牽纜此江臯  
遠山雲外橫千里新水船頭長半篙  
鷗鳥驚飛前渚去烏鴉又向隔林號  
倚篷酒醒寒相逼喚起山童整敝袍

峩橋雪霽

入圖畫

嚴允諧

玉龍戰罷鱗甲摧玉妃無數下九垓  
溪橋高下銀成



堆金鳥飛上扶桑枚顛令萬物生光輝客騎驢背去  
復回忍寒渡橋君試猜不是尋詩定訪梅

三山秋月

入圖畫

前人

三峰翠嶽鬱蔥神工削出真芙蓉桂影飛上滄海  
東須臾寶鑑懸長空老猿弄影掛樹啼鳥鵲亦有枝  
堪栖山翁愛月楊明輝把酒對月重賦詩

覆釜晴嵐

入圖畫

前人

女媧煮石補天漏五色補天天補就大釜至今從地  
覆乾象穹窿壓神厚天光散作翠嵐浮為雨為雲潤  
巖竇朝來拄笏看爽氣方寸盡歸仁者壽

浮丘丹井

入圖畫

前人

浮丘峰高三十六三十六峰如削玉浮丘仙去三千  
年山中獨遺丹井泉井泉寒冽深更深鬼神呵護到  
於今山下幽人時極目尚有丹光穿樹林

荻浦歸帆

入圖畫

前人

西江水濶清可掬江上征帆歸興速遠從天外忽飛



來波心影落玻璃窟翩翩疑是雁翱翔悠悠恍若雲  
馳逐夕陽西下徑何之乘風遠過海門曲

文昌宮

前人

林樾蕭蕭一境寬仙家樓閣跨高寒桃花曉色迷城  
堞芝草春香護石壇琪樹靜中韶鶴下碧潭深處毒  
龍蟠道人日飽青精飯閒把黃庭取次看

萬壽寺

卽化城寺

前人

樹遶祇園水遠堤市塵渾不到招提半窗白月見猿  
掛一榻綠陰聞鳥啼座擁金欄僧設講壁垂玉筍客  
留題年來我亦耽瀟灑幾度重遊散馬蹄

無相寺

前人

路分烟草入林堦臺殿參差接杳冥僧獻茗花來後  
院鶴搖松子落中庭湖光冷浸青銅鏡山色晴開翠  
玉屏最愛上方幽閒處六時鍾磬自泠泠

尼坡梅月

前人

殘雪坡前水漾澌孤芳皎潔月明時暗香浮動通虛



逕竦影橫斜浸碧漪素質祇宜和靖識真心獨許廣  
平知幽人紙帳閒眠處骨冷神清入夢遲

咸寶圩桓玄故赭圻城在此

前人

曉乘清興過咸溪風景蒼茫望轉迷如意好花當馬  
落盡情幽鳥傷人啼數家茆屋牽蘿補幾處沙田帶  
雨犁薄暮欲尋歸去路小橋流水夕陽西

登橫山訪陶貞白僊跡

鍾銘

曲磴穿雲上冷然御太虛寺經桑海變墓自晉唐餘  
雨過山容皎雲低松影疎幽竒探未盡如夢入華胥

秋夜泛舟丹陽湖

前人

一片空明境界殊疎林遙觀野雲孤沙鷗影逐波深  
淺漁笛聲隨風有無湖蘊月輝光若練楓經霜染錦  
如鋪停舟四望渾無際恍覺身輕在玉壺

姑孰

謝騫

江南佳麗地吾郡亦如何謝眺青山宅桓溫白紵歌  
丹湖漁棹滿采石客帆多最愛月盤景長松掛薜蘿



太白墓

前人

不見風流李翰林數椽祠宇對雲岑  
匡時徒抱經綸志載籍爭傳正始音  
故隴荒涼春草合斷碑剝落雨苔深  
升沉莫論開元事贏得芳名照古今

遊景山

前人

半山亭在月盤峰幾度登臨興未窮  
野水閒雲孤島外疎櫳石磴百花中  
龍噓雨氣迷深洞鶴鼓風聲動怪松  
春社散來循舊路桑麻深處綠烟濃

登六角亭

鍾城

春風厲修垆餘寒峭孤往晞髮太白樓  
鼓掉胭脂港迴還丹林岑超忽紫烟岬  
睨彼六角亭登升詎虛罔窟宅隱僊洞  
奧窔秘人壤遐馳本年歲擷勝希今曩  
瓊界擴往運崎人擅華獎山空雨鬱蒸  
江崩氣汪濊日月炯懸照乾坤曠虛朗  
放岩榛蕩密遵渚鼃鼃阬危波沃陽趾  
反徑造幽壑洪濤亂雲煙日夕駭衝撞  
睨視發蒙覆俯窺乃空蕩松浪瀉奔壑  
煙標闢玄蒙



林麓互蔽虧樓閣恣弘敞曲磯轉隱見孤舟去鬢髮  
鬱哉崇丘垆洞矣修谷響金牛鎖員嶠靈匹停玄想  
槭槭蘿屋飏鬢鬢奔雲上依依池閣暝颯颯風雨莽  
塵世脫束羈宇宙一偃仰蹇予山水情茲焉修躅枉  
浩歌欲何言徒倚千華杖

登白苧山

端宏

日月隨天壁煙霞繞洞宮簷濤散春竹石氣灑寒松  
江濶雷門殿雲孤白苧峰回瞻三萬里鳴鸚薦長風

黃山廣福寺

劉源

方外松蘿隔綵霞日移金碧絢窓紗香焚石鼎飄輕  
縷鉢洗山泉帶落花樹色雲迷巢野鶴鍾聲風送起  
林鴉老僧定後禪機息斫竹敲冰旋煮茶

凌歊臺

李蕙

三千歌舞地老樹鎖蒼烟殿古成荒徑碑殘刻宋年  
啼禽應哽咽流水自潺湲世事渾如夢登臨倍悵然

凌歊臺

謝理



鳥道崎嶇上復回  
攀蘿挽葛剩青苔  
也知地老天荒處  
曾貯燕歌趙舞來  
谷口鳥催春雨急  
渡頭帆帶夕陽開  
二陵只在江雲外  
環珮應敲月下臺

凌敲臺館淡烟霞  
尚有鮫人識絳紗  
土砌不生蕙莢草  
山房唯見欵冬花  
龍鍾無意對春鳥  
鼉鼓有聲來晚鴉  
蘇晉長齋仍禁酒  
月團空憶建溪茶

橫望山武安王廟二首

楊觀

鶴書無復下雲坳  
廢井荒園掩白茅  
雨後亂山晴翠

合春深萬木綠陰交  
斷崖曾說神蛟出  
破碣誰因野火敲  
莫向東風傷往事  
夕陽歸鳥下林梢  
山從疊處自成坳  
坳裏禪房亂覆茅  
曲檻斜通蔬圃近  
小窓低與石楠交  
霏霏花雨鍾初靜  
灑灑天風竹自敲  
白髮老僧忘甲子  
年年春信試梅梢

謫仙樓

前人

偉哉唐學士  
萬古誇風流  
長庚夢初破  
光嶽氣完收  
驪珠迸玄窟  
瑞彩騰九州  
神蛟起滄海  
紫鳳翔丹丘



一靈煥天性萬里隨敷求文章重天下特立邈難儔  
鏘鏘組金石燁燁冲斗牛浩渺吸河海放逸奔驂騮  
才名震寰宇文章飛冕旒彤廷卽召見降輦迎殿頭  
寶牀賜前食御手調羹羞綸綍掌密命操觚輔皇猷  
方將試大用籍籍羣校讎一朝息機用飄然駕歸舟  
仙颺颺輕羽詩酒恣嬉遊飛帆過采石雅爲山水留  
錦袍照綠蟻對月聊自酬酒醒弔玄暉遂作終身謀  
上帝奇君才召記白玉樓擊地墮梁木倚天折吳鉞

墨跡天地久豪氣烟雲浮我來過祠下下馬拜以投  
竦容瞻古貌慨然慕前修溪毛采香綠清酒沽新篘  
一酌復三歎孤心懷百憂穹碑翳葑蘚荒祠掩松楸  
弱柳掉風力織花弄春柔夕陽拂征衣回首陰雲愁

雙桂峰 入圖書

徐 鉉

佛道通僊靈姮娥亦皈向手持雙桂枝徘徊下雲帳  
金花映頤頰香風正飄蕩姮娥天上雙桂屹成嶂  
如何植物性知戀慈仁相堅守菩提根永絕蟠桃餉



婆娑清夜影依約半乾象

洗硯池

入圖書

前人

翀霄姓王氏云是羲之兒性潔愛山水好書復臨池  
波間洗破硯墨浪飛玄魚羲之寫黃庭名聲千載垂  
翀霄書涅槃字畫與竝馳二子已僊去遺跡人間奇  
春風翰墨香秋雨蛟龍悲飛鳥不敢過何必高藩籬

謫僊樓

邢珣

采江寄遐矚滄波浩無邊絕壁俯巨壑秀色欺雲烟

憑高訪先躅牛渚畱真傳王孫太白精驚姜下南躔  
壯遊半天下志不忘溝填才名撼天子韋布登瀛僊  
讒毀捍恩澤乞退匡廬眠矯矯梁棟材乃不中榱椽  
將將廟堂器苦窳輕磨鑄致令諷諫詞往遙空談玄  
俛焉漁陽變白日橫戈鋌乘輿徙西蜀海沸龍爲鱣  
時公駕丹丘雲駟任飄翩纍纍潯陽獄自度無二天  
義哉汾陽報匪售私恩憐長流亦君恩臣罪當萬千  
天光炤幽蟄放浪還歸田愛此姑溪勝扁舟涉津淵



醉來捉江月曠望登雲巔興至恣吟嘯曳踵盧王前  
卽此心醉處人去山連娟崑樓現金粟墓草眠烏拴  
世事電一白遺芬播青編回思長安陌衰柳號寒蟬  
公逝有不泯玄宅空長嘯

螺磯

胡燿

長江一寸碧兀兀中瀕洞巴湘春晝浮淮揚秋暮動  
萬古此登眺獨立誰與共

凌敲臺

集古

王禕

九天春色望中回

李子飛

獨上前朝歌吹臺

詩學

苑路

暗迷香輦絕

元禎

風雲猶似翠華來

揭奚斯

城頭煙樹

旌旗合

竹溪

山下樓臺紫翠開

范德機

試問繁華何處

在

李甫山

舊遊巖石長莓苔

黃潛

赭山

前人

寒山半出白雲層

劉滄

高塔晴來獨自登

鄭谷

山勢

北來連帝闕

王維

江湖西去遶金陵

林廷舉

嵐光香靄

開圖畫

歐陽恭

夜靜分明見佛燈

瞿祐

景物未窮登覽



興子昂欲將舍利問山僧范至

神山集古

前人

斷碑無字草芊芊李羣此地興祠不計年錢彥古殿

陰雲終日合蘇子美長松風雨半空懸同上千家落日

粉榆社淵海百里西風穰程天錢逸自古英雄須廟

食傳若堂堂遺像在凌烟張藉

長河集古

前人

寒潮惟帶夕陽還皇甫冉銀漢無聲轉玉盤東坡萬頃

碧波秋影淡劉得仁一襟涼沁夜光寒周賀河流倒浸

分雙月潭水西來轉幾山楊公濟為愛滄浪濯纓

處李逢吉蒹葭煙盡水如藍胡曾

慈姥磯孝子祠

王孜

孤舟似匏繫風中三更月出江水空慈烏忽翻廟前

樹落葉亂下頭上蓬睡來反側坐偏倒布被如冰髮

如草家山咫尺不得到荒壟寒雲誰為掃乾坤百年

風木情海波浩浩何時平



孝烈橋

前人

淮賊舳艫蔽江滸銅鼓如雷箭如雨山川草木盡顛  
連誰家裙釵心有主帳前花枝漾蜂目橋下春波照  
顏玉白頭魂返豺虎口翠翹影落魚龍窟露觔女祠  
曹娥碑河流一帶雙清輝

丹陽湖八景二首

謝玉

水漲平湖雨後天沿堤楊柳帶朝烟濃陰匝地鶯聲  
細絕勝章臺近灞川

楊柳

天邊飛下雨三行點破蘆花月底霜萬里不辭關塞

遠年來年去解隨陽

落雁

龍山

楊洪

龍山挿晴昊秋色染芙蓉疊嶂丹青裏奇峰紫翠重  
更無人落帽時有客扶筇撫景歸來晚楓林帶醉容

凌歊臺

楊深

浮丘佳勝路紫迴霸業空遺宋祖臺山色不隨時勢  
去江聲遠逐暮潮來香銷紅粉千年恨花落東風幾



度開吊古遊人倍惆悵斷碑磨滅鎖蒼苔

白紵山

前人

白紵山前晚逕深松風飄拂綠成陰蒼波影合潮初  
上碧幹涼生日未沉一曲絲桐秋鶴唳半空雷雨晝  
龍吟徂徠賦後秦封遠千載伊誰續賞音

登清風樓賦

祝鑾

傑哉茲樓余初登以逍遙瞻景和今日麗盼山青兮  
水濔縣縣兮遊絲猗猗兮柔條何羣葩之芳菲穠豔

以交媚兮乃大化之所調忽處嘯兮山之椒起綠蘋  
兮鳴鮮颺初颺颺兮冷冷條習習兮條條發蘭臺之  
高詠滌煩襟以潛消駕蒼虬兮吹碧簫翩雙鳧兮拉  
子喬歌南薰兮解愠恊朱鳳兮聞韶懷美人兮路迢  
迢川有梁兮陸有輶恐流光兮冉冉颺飛絮兮飄飄  
登高兮吾將瞻蓬島兮訪參寥安得乘風千里於一  
朝兮于焉報之以瓊瑤

月盤亭

前人



畫棟朱闌露氣寒新亭竝立檜杉攢天橫一帶拖江  
練人靜千山見月盤古洞出龍靈雨沛羣仙跨鶴碧  
霞餐登臨竟日忘歸去便欲乘風刷羽翰

登太白樓

前人

采石磯頭太白亭三年一度此鳴舲長江千古流詩  
派殘月中天見酒星放浪祗疑天地窄氤氳長萃海  
山靈何人吹笛招黃鶴有客携壺過翠屏

登白紵山

端廷赦

白紵春風好杖藜鷓鴣依舊滿山啼僧持野菜炊香  
飯鳥啄閒花宿古隄隔嶺雲霞堪入畫近城樓閣若  
爲梯傷心歌舞當年事一帶斜陽芳草迷

冬日謁青蓮墓

楊東

霜林迢迢鎖荒臺爲吊孤臣黯自哀百代才名高日  
月千秋藻筆走風雷衣冠已謝青山老華表空存白  
鶴來把酒更傷投死事不堪殘照下蒼苔

采石晚眺

前人



揚帆到石門素琴愜幽抱隔浦有人家山行苦奔峭  
落日鍾磬清空江倚孤棹

登峨眉亭

倪嵩

峨眉亭構鬱雲虹影入煙霄路欲通瓊嶼艷粧迷曉  
月石樓香霧起微風青紆不斷春山外翠斂還凝夕  
照中此日登臨無限意共君長嘯望江東

靈墟山賡韻

鍾書

岩畔猶存煉藥基蒼松白石浸寒漪月明華表遼陽  
夜正是真僊跨鶴時

峨眉亭

楊金

江上峨眉亭屹立山之巔下有牛渚磯奔濤響潏潏  
楚岸樹亦古吳門花欲然梁山鬱嵯峨中流一帆懸  
眺遠豁心目登高俯市廛羨彼簑笠翁沽酒烹魚鮮  
世代有興衰江河多變遷捉月理不經燃犀事亦玄  
往者不可問徒有空名傳我來值初夏憑欄意茫然  
何不飲美酒而乃媿謫僊



花津晚泊

前人

蘭舟蕩樣水雲平孤劍青氈伴客行一抹好山酣夕  
照滿林殘葉亂秋聲手持苔蘚魚經古心遠江湖鶴  
夢清起問鄉村別來事人家空有舊時名

青山道中

前人

李白祠前霜葉飛茅簷當路客來稀謳歌何處忘機  
子曰伴烟霞上釣磯

白雲寺枕最高峰石磴荒涼野興濃貼襯眼前風物  
好數株松老欲成龍

黃山

端廷相

數峰青未了幾度白雲鍾古寺開幽徑荒烟起暮春  
松筠高百尺遠近翠千重老至耽修寂扶人當倚筇

姑溪

端鈇

烟鎖橋頭散綺霞忘機鷗鳥踏汀沙晴川畫舫牽楊  
柳小店青旗出杏花遶屋寒星高士卧傍門流水野  
人家賦成歸去來辭晚鐵笛橫吹放鶴斜



青山

倪伯鯨

蒼岩南面白雲多一徑紆回蔭薜蘿山色萬重分虎  
檻水源千里下龍河高臺擬作憑雲去絕壁還成藉  
草過莫以流光牽宿醉更教飛棹送微波

藏雲寺

前人

黃葉下紛紛塵囂寂不聞山空能貯日寺古獨藏雲  
曉供諸天切香臺下界分何時脫凡想從爾叩真文

五柳渠

在馬埠橋

前人

白馬山前渠路長黑沙湖上映垂楊春風不瑣寒溪  
水盡日潺湲到草堂

春日登青山

倪伯鯨

諸峰廻帶一山尊獨采桃花過遠村九井煙光連地  
合八湖春色到江分漫因古渡尋芳草更向寒泉望  
白雲幾接飛蘿空海界不妨天上有人羣

青山望巢湖

前人

返照下石壁高江生暮寒巢湖一片影日日上青山



太平三書 卷之十  
采石懷太白

前人

夢斷金雞海上村  
天涯狂客老吳門  
扁舟遙下半江  
月錦鯉空飛一酒尊  
金馬此時終去國  
青山千古不歸魂  
乾坤俯仰情何極  
寂寞新亭風雨昏

登白紵

前人

春行獨攀躋澗道  
自紆整危峰何舉  
犂直與煙霄併  
浮雲度碧石巖花散  
天景情存江漢遠  
意愜朝市耿  
山空無人聲聞寂  
發深省肅肅草蟲語  
悠悠孤鶴音

凌歊懷古

前人

十山樓闕對江門  
巖畔高臺過雨痕  
吳國草芳虛落日  
蜀江天盡見孤村  
空思野徑埋歌舞  
誰復荒基辨  
寢園人世興亾多少  
恨斷碑枯木自朝昏

女郎祠

祠在黃山

前人

會令山鬼縱文狸  
幾許雙旌拂曉飛  
蘭杜有香薰帝  
闕佩環何日響  
仙扉池開璧水畱  
天影簾捲松花落  
寶衣一自琳宮成  
道後海天秋水自心期



神構仙媛昔所聞班鸞紅鳳若爲分漫看春色隨流水肯委閒心與白雲雙鯉正思青玉案一筭遙對紫皇君五城十二樓中月何處吹簫落雁羣

春日登雷巖同辰山諸丈

前人

雷門俯開曠坡陀帶平疆長風驅松濤直下千仞岡絕壑畱孤煙花木麗芬芳洞口逢僊人雙簫吹紫皇緣茅數棲鶻白露生微茫始探心獨愜中更意彌康孤浦截寒波密林崇晞陽萬物洞光景衆鳥爭翱翔金書報鸞鶴浩笑凌青蒼

湖陰道中

前人

路轉溪南白日斜古城荒水浸平沙依依鳥宿煙中樹渺渺人歸江上槎草帶有香分雨氣荷衣無夢薄煙華三秋別恨思今日悵望西巖紅玉花

集嶼磯

前人

東風倚棹吳門地濤頭曉日城霞氣護江堤上柳搖天涵碧樓中花滿砌沙暄草軟青莓苔古磯斷瀨相



滌迴天門兩梁飛棟立斗柄倒掛煙雲開遠見  
巫山色水色山光兩無極凌風馱鶴下蒼茫竹笛一  
聲青嶂碧三台夜列天氣秋旗鼓不驚江畔鷗靈妃  
額上探珠盡何但崑崙問赤丘

靈墟山題丁仙遺蹟冊

謝九鼎

僊翁去不返丹竈委層峰真境久寂寥烟蘿闕靈蹤  
香花墜岩谷寒澗清心胷孤思凌風鶴幻若行天龍  
世人那復見或與安期逢虛無固難覓想像徒爲容  
瞻對低回處數聲雲外鍾  
千載丁公傳羽化空餘井臼碧山阿何年再返遼東  
鶴應嘆今人塚更多

題金柱山

梅淳

孤標宰堵郡城西蠟屐爭疲百尺梯忽有雙蛾天外  
秀回看千雉牖中低種桃種李芳沿岸垂柳垂楊翠  
滿堤廿載神功三丈石摩娑今日有鐫題

金柱山

謝裘



扶筇直上意冷然醉眼蒼茫盡楚天  
疊嶂東來朝爽裡大江西去夕陽前  
舟移濃艷栽花听馬走芊綿  
馴雉田好景勝游人不厭至今芳譽共碑傳

九日同倪士馨登龍山用杜韻 葛森

木落秋山樵徑寬布帆輕下共追歡  
黃花又醉陶家酒短髮還欹杜甫冠  
斜日漸隨千樹暝晚煙橫帶一溪寒  
風流叅佐今塵跡明月青山最耐看

夜泊采石

徐宗夔

繫舟入語靜纖月映江波木葉秋交下  
山烟晚更多隔雲孤磬杳照水一螢過  
估客誰相問中宵發浩歌

九日同老友張墨田錢惺一王式之攜毛生李

姬泛舟登蛾眉亭

倪伯鯨

輕舸容與問江關秋水長天趣更閒  
黃菊時分杯底色紫萸微映座中顏  
犀燃牛渚疑千載烟鎖天門妒二鬢  
策杖不愁無濟勝還期呼月醉寒山

秋日偕士馨甥游青山

王之典



名山堪着屐落日共登臨江帶天門霽秋生大壑陰  
蟪蛄封講席龍象泣祗林欲問玄暉宅青山自古今  
九日同倪靈海泛舟姑溪時初自楚歸前人  
天涯飽看洞庭秋歸及黃花續勝游短髮不堪吹落  
帽閒心真可對眠鷗山容傍晚青留席水氣浮天白  
上舟髣彿湘靈猶鼓瑟不知吳棹起清謳

舟歸采石

端 鉅

蒼茫山氣靜落日大江流潮湧千家雨帆懸兩岸秋

髮稀空鶚冠寒重着羊裘不盡古今意還登太白樓

長興烟雨

崔 曄

東北重巒接上臺西風驚雨濕雲迴一雙白鳥歸飛  
急兩道青泉拂面來埜老杖藜春草滑村童吹蘧暮  
烟開須臾霞彩留高嶺萬壑深深點綠苔

白紵山懷古

葛師夔

當年高宴綺羅歡絃管珊珊送夜寒一剪月魂江色  
白滿山春影露光殘曲傳商調哀如玉人憶燈前氣



似蘭今日尚存歌舞地  
遶原荒草恨云漫

謫僊樓

潘 諤

青山有塚名浪傳  
中酒僊鄉正熟眠  
萬古能消幾塲  
醉人生何用獨醒然

謫僊人去雅詩亾  
千載風騷孰擅塲  
我欲騎鯨追逸  
駕江頭雲氣曉蒼茫

雷峰

楊成喬

選勝陟層巔  
高高興灑然  
亂峰橫夕照  
一水帶春田

客有焮霞癖  
人多嵇阮賢  
飛觴徵麗曲  
共醉欲忘還

謝公池

陶 澗

風流誰起謝宣城  
坐對空山想像生  
舊宅已銷千載  
跡新詩猶擅六朝名  
池邊鳥度浮雲影  
谷口鶯啼落日聲  
更上懸崖春色暝  
萬峰蕭索不勝情

蛾眉亭遲任一吾毛繼泉

倪光胤

楚客蕭條悲遠遊  
蛾眉東下亂帆秋  
高江白浪浮孤  
嶼古樹黃花對驛樓  
天闊鳥橫青嶂月  
霜空人散綠



蘆洲炎方朔雪還多事人世塵心倍百憂

初秋偕倪蒼舒姑溪夕泛

端汝洛

野性從來偏狎野與君終日坐孤航人疑縱酒同嵇  
阮誰識玄言似惠莊水落濤侵茶椀白晚來風透葛  
衫涼迴橈爲問蓬蒿宅徙倚柴門戀夕陽

再遊馬山菴

倪一鳳

水色通幽徑香光接絳臺海樓今日度僊客幾時來  
松子月中落芝房雲外開會心兼送目一望一徘徊



